

6

民國八年冬季至九年
亥夏止

公牘鱗瓜
四

牌示

照得國家設學在得真才學生畢業應嚴考驗庶教者不能
誤人子弟學者有以慰其父兄本監督少不好學長乃無聞老
大徒傷嗟悔曷及今承乏斯邑甚不願青年學子再誤歧途也

茲定於本月十三日為考貞靜女校畢業之期十五日為考高國學
校畢業之期女生無多即在本校舉行高國學生畢業地點定在
模範高校舉行並實行扃門考試派警巡查除特派監考專員
監查外所有各校職教員應即退出一律迴避高等國經題目及

國民各項題目均由本監督親自出題並聘請校閱評定分數以昭慎重至在堂作文時間如有携帶書冊一律檢查不准披閱若送食物並應搜檢以杜夾帶除特派本公署職員充當監考專員從嚴監視外合行牌示為此示仰該各校職教員暨學生等一體遵照切切特示

照得房班之設清沿明制民國成立疊經明令頒布一律撤銷行政公署改用科員雇員及行政警察司法公署改用書記員錄事及承

發吏司法警察通行遵照為國服務在案甘肅邊僻因循未改頃

又奉到

省長
高檢廳長

令文照章改用不得再令房差干預公文到署查本縣

蒞任之初即將兼理司法公署應設書記員錄事承發吏司法警察
一律由舊日書差內擇其勤能可靠者選充服務呈明 省長高等

審檢兩廳長核准亦在案茲奉前因除再將本行政公署依法
組織呈報外所有本行政公署照章委用科員會計員統計員糧
差雇員外無所謂從前房班名目也本兼理司法公署照章委用
書記員看守所長錄事檢驗吏承發吏司法警察外無所謂收發

管押刑書快役名目也又所用員警均給薪費除照章由當事人
給予送達費錄狀費膳宿費外更無所謂從前無名賄賂也自此
改組呈明後各該員警自應革面洗心痛除積習勤勉從公各奮
前程但有不知自愛者利令智昏遺誤要公教唛舞弊者一經
察覺輕則革除重則法辦決不姑寬俾莠亂苗以肅紀綱至公訴
私訴之當事人如不遵章給費希圖送賄自輕一經察覺與授
同科分別治罪決不寬容當茲歲首特為布告悉去舊染咸與

維新切切此布

呈設正俗學社改良戲劇請發劄本

呈為呈請核示事竊查戲劇歌謠感人深矣荒村僻野寡聞甚矣
村夫俗子每以觀劇學歌為惟一之進化化民成俗自以改良戲劇
為移易之先聲况乎舊劇演者類染嗜好無盡態極妍之精神且
冠帶襪履鎧甲鮮明之氣象劇本口傳步趨紊亂誨淫誨盜使
詐使貪戲之所至賭即隨之徒傷地方淳朴之風化更壞天真爛漫
之青年欲圖社會之改良宜去播惡之舊劇爰集紳商詢謀
僉同擬在靜城創設正俗學社改良舊劇發揮新聲仍扮忠

孝節義之往事參演愛國強種之戲文苦無劇本用資楷模
茲聞山東省長咨署改良劇本多種合無仰懇 鈞示允准飭發山東
劇本以便抄錄而資取法一俟錄竣即行呈繳以廣流傳所有呈請
令發山東改良劇本以資演效而正風化各緣由理合具文呈明
廳長俯賜鑒核訓示祇遵謹呈

甘肅教育廳廳長閻

論前學事員能倫久校及成員文

養成健全人格發展共和精神二語係八年教育部議決中華民國

教育新宗旨也所謂健全人格者一私德為立身之本公德為服務社會國家之本二人生所必需之知識技能三強健活潑之精神四優美和樂之感情是也所謂共和精神者一發揮平民主義人人知民治俾為立國根本二養成公民自治習慣俾人人能負社會國家之責任又從前公布之教育宗旨係注重道德教育以實利教育軍國民教育輔之更以美感教育完成其道德是也今各校教職員均負教人之責任若研究應如何教人之問題不可不從上兩項教育宗旨推敲矣特諭該員轉諭各教職員秒錄一通認真研究以重職務

禁革小押當
布告

為布告事照得小押當為前清所屬禁民國刑律得受贓物載有專條似此不正當之違法營業便利竊賊包藏贓物光天化日之下豈能有此秘密窟穴誘引青年作惡墜溷若不從嚴禁革草何以草澆風而端人格除行警團嚴密查禁外合亟布告為此仰仰合邑各界人等一體遵照自示之後如有此項營業拿辦不貸切切此布

指令各校校長
教員文

照得本監督前發表簿多未實行且訪聞職教員任意停課並不呈報學生隨便請假不予限制殊屬大違學章茲由本監督開列數端合亟令仰該校長等遵照辦理嗣後如省縣視學員及專員查報有違背事情本監督定行照章撤退以重學務言出必行決不姑貸切切此令

開學申事項

- 一各區高等小學學則應遵照縣立第一高小學校學則辦理
- 一各區國民學校學則應遵照第一模範國民學校學則辦理

一高小國民校長應恪遵校令規定一律住校

一高小國民校長有事故時須在監督處請假教員有事故時須在校長處請假假期逾一星期者請人代理職務

一高小國民學校除星期國慶孔子誕日紀念日照章放假外不得

擅行停課

一高小國民學校學生課本所用紙張大小開學時由各校長酌定

一律令學生自備

一高小國民學生平時各門成績須慎重保存以備視察時參攷比較

一高小國民教員平時授課給分不得濫與如程度過劣而給分尚優者由縣視學查明指駁

一高小學生年終試驗成績過劣者實行留級不得因學期已滿率請畢業

一積分簿學生盡到簿職教員盡到簿學籍簿操行簿請假
一各圖書目錄器物目錄等自本年開學日起各校一律實行
一高小國民學校是否恪遵校令施行細則暨此次申令事項切實辦理應由縣視學逐項查明呈報以資考核

一高小國民學校令施行細則本校學則各種表簿圖書器物目

錄暨奉到公文等件責成各校長妥慎經理列入交代

指令勸學所長勸學員認真整頓學務文
縣視學員

照得教育為強國本計本年年全縣學務亟應認真整頓以符定章惟是城鄉未能同一進化規章多未實行學童頗不足額訓練亦未精密當此歲首開學之時若不委派專員監察督辦會同各該校校長教員暨巡官籌辦員等竭力改進殊不足以策進步而重學務合亟令仰該員馳赴各該校照依本監督

所定辦法認真辦理毋得敷衍粉飾致干重咎切切毋違特令

開學趕辦事項

一各區國民學校學生多不足額應於開學時委派勸學所長縣視學勸學員協同各區巡官巡長督率鄉約調查各該區學齡兒童強迫入學私塾有不改良者照章取締

一各區國民學校學名額第一區第二區第三區國民學校名額至少五十名

以上其餘各校至少四十名以上

一縣城內吳家廟威戎甘溝高家堡單家集學生名額委勸學

所長監察辦理計都通邊野趙新集章麻學生名額委縣視
學監察辦理雷大灣李家店朱家店水洛城焦韓店學生名
額委勸學員監察辦理

一各區如有阻撓調查學齡兒童強迫入學情事應由專員據
實呈明監督核辦

一各區國民學生足額後由各該校長造具學生一覽表呈費備案
並由專員將各校學生總數先行呈報考核

教授訓練管見

一每星期一實行敬禮國旗宣誓式

一每月終試驗限定鐘點過時作廢不准槍替

一劣等生管理法應輕罰立正重則體罰屢戒不聽則通知其父兄開除
一曠課補救法少則體罰多則扣分數屢戒不聽則通知其父兄開除

一練習國語以清口齒

一練習講演以資辯論真理

一國文除論說外應重應用文字

一算術除筆算外應重習珠算

一地理歷史除依課本外應編授本處鄉土沿革以及本地輿圖若能編成課本更好

一理科除依課本外應注意本地物產

一手工應參用本地所出原料製造工藝品不作無益玩具以免費時

損腦

一圖畫應重繪圖案及工業商標等畫以資實用

以上各節抄交專員轉知各該校長教員各抄一份研究改進以期學童在學一日能得一益不至學非所用用非所學博而寡要勞而少功也該職教

員慎勿河漢斯言九年舊元旦手諭

警察各區分設巡查處辦事規則

一警察各區於距離駐在所與派出所較遠之繁盛衝要鄉鎮設置該區警察巡查處派巡長或一等警輪流巡查以輔區警之不及而為鄉警察之初基此警察巡查處呈准設置之宗旨也

一全縣各區擬暫設六處每處派巡長或存記巡長一名預備警二名或一名以資服務六處地點即東區焦韓店南區朱家店韓家店下鎮治平鎮中區威戎鎮西區雷陽鎮

一該巡查處如發生違警事項經當事人報告到處該巡長等視其事小亦准排解如事大即派警開單送交該區駐在所巡官等受理以示限制

一該巡查處依違警罰法只能處應罰人四元以下之罰不准再多除刑事重犯外不得拘留以免僭越

一該巡查處除受理微小違警事項外其重要職務條列於左

一該處區域內查禁種煙

一該處區域內查禁纏足

一該處區域內查報官荒

一該處區域內查禁盜賊

一該處區域內查報戶口

一該處區域內查催公款

一該處區域內查報植樹

一該處區域內查報農務

一該處區域內保衛學校

一該處區域內查護售藥

一該巡查處應領餉款每月由罰金開支外再有不敷准由所具領以
資辦公

一該巡查處就各鎮公共處所居住門外准懸某區警察巡查處
白地黑字木牌一方警棍二枝

一本規則自奉令核准之日施行如有未盡事宜應隨時增入之

呈為呈請示遵事案查四五兩年公債迭奉廳長訓令內開查妨害
內債信用懲罰令第一條內載屆期付息還本經理人有意遷延或

不付者處以一年半以下之有期徒刑二百元以下之罰金等語令行
知事遵照毋再玩延干議等因奉此查縣屬鄉城村鎮各紳商原
認四年公債壹萬壹百捌拾元原認五年公債六千壹百肆拾元
當即發給債票並遵令屢催領息各在案乃再四票催專員守提
各經理人及各債戶按期領息者固多而屢催罔應抗不領息或
經理紳士擅自私賣者亦復不少甚或輾轉私售既不與債戶分
給債票亦並不向經理機關呈明種種違法殊難枚舉現又分行警
佐各區巡官巡長確查未領息票各經理紳商有無私售延壓情

事據實呈報以憑核辦以免妨害國信如果查明實上項情弊應
否據懲罰令第一條之規定援引刑律判處罪名以昭炯戒之處伏
候訓示祇遵理合具文呈請廳長俯賜鑒核指令遵行謹呈

甘肅財政廳廳長丁

呈為呈覆事案奉 廳長指令辦理養正蒙養院各節具復核
辦等因奉此知事遵查廢倉院舊址當日留作地方公用並未列
入官產故呈財廳備案應懇俯賜立案核准以宏教育蒙養院

字已遵令照章改作園字至開辦建築各經費暫由知事捐籌
將來籌定若干及兒童報名完竣教員任事於六月一日開園後
再行造費表單履歷以昭慎重所有呈復遵令具覆各緣由理
合具文呈明廳長俯賜鑒核訓示祇遵謹呈

教育廳廳長閣

呈為呈懇恩宥錄用事竊查靜甯縣警察所前二等巡官王觀
因案撤差半載以來杜門悔過頗能悛改靜會比鄰傳聞較確

若不據實呈懇 恩施逾格再予錄用在該巡官實無自新之
途且上負 處憲教誨栽培之大德茲查靜甯教練所擬不久
開辦第二班又鄉鎮區所曾經呈以推廣設置巡查多處更應
需人稽查以重職務當茲需人孔急之際受過警言察教育之人
亦屬寥寥如蒙 恩准棄瑕錄用由知事嚴加約束仰懇
俯准給予委任教練所教練員並兼警言所稽查員委狀一俟該巡
官果能勤奮從公著有成績再由 知事 呈明升用以昭激勵所有
呈懇恩宥錄用已撤巡官王觀給予委狀各緣由理合具文呈明

處憲俯賜鑒核訓示祇遵謹呈

簡任甘肅全省警務處處長鄭

植樹節規則

一縣知事植三十株以示提倡

二承審員奉祀官管獄員科長科員書記員等各十株

三警佐二十株團總二十株

四巡警每名五株團丁每名五株

五雇員承發吏得酌量情形一律栽植至少每名三株

六勸學所各職員各學校職教員等每員各八株

七各學校學生每名各三株

八商務會正副會長勸學總董各十株

九林會農會天足會禁煙會各會長會員各十株

十其他保董甲長及鄉約各六株

前項一至十新栽樹木均順西大道舊有官樹空內補栽之

民國九年行政司法立法各項計畫

一教育

提倡開辦公立中學校

籌設乙種工業學校

籌設通俗夜學校

籌建小通俗圖書館

添建高國各校講堂

委派專員赴鄉監察各校實行學章學則

添建通俗講演所閱報所

添設四鄉通俗講演分所及閱報分所

籌辦女子高等小學校附設女子國民學校

創辦養正蒙養園

創辦正俗學社改良舊劇扮演新曲

一商務

籌設提倡國貨會

籌設農工銀行

開辦全縣興業物產展覽會

一農務

籌建農業試驗內場及外場並各分場

派會員下鄉講演改良農業事項並調查河流為開渠蓄水計畫
製造防旱農具防電礮具

一林務

創辦苗圃

補栽東西大道楊柳

郭城舊址全植楊柳

呈領河灘為造林場所

一內務

籌建功德祠

籌辦開通靜泰車道

開辦第二班警察教練所及添設各鄉巡查處為鄉警察之準備
天足會同警察所每月朔望實行查禁纏足並籌設天足保婚會
實行行政分科辦事

警察勵行公共衛生事項及調查各鄉戶口實數

保衛團籌增彈藥並實行團章

籌設公共澡堂

籌設公共餐館

一工業

創辦中和火柴公司

開辦毛棉手工傳習所

提倡改良各種土貨設立改良土貨研究所

司法項下

一承審員 實行照章辦公為將來改設地方分廳之準備

一看守所長 委獄員兼充照章辦公

一書記員錄事司法警察承發吏檢驗吏照章辦公

一監獄囚徒實行作工並實行講演訓誨

立法項下

一縣議會

一籌辦自治講習所為將來縣議會成立之準備

一並籌定縣會地點及籌款建築各事宜

附慈善機關

一創辦博濟施醫院推廣施診施種牛痘

一仁愛施藥處推廣施藥

布告

為布告事照得本行行政公署兼理司法所有錄事承發吏司

法警察等業經呈明設置照章服務在案惟訴訟當事人
應出費用一般人民多不明瞭茲特依章懸示俾眾週知按高
等以下各級審判廳試辦章程第九十條載錄事抄錄全案卷
每百字應徵收銀伍分以三千字計算應徵收壹兩伍錢均應兩造

給付又第九十一條載承發吏送達文書及傳票費每次應徵收銀壹錢又第九十二條載傳票及送文書十里以外每五里應徵^加銀五分又每日加徵食宿費銀三錢是一日以五十里計算應徵收銀八錢如兩造有意耽延即由兩造照數担任是此項照章費用當事人自應照章繳付以資辦公此外該錄事承發吏等不得再有需索自罹法網當事人亦不能行求賄賂同干重咎合亟布告仰合邑各界人等一體遵照切切此布

令各區查禁纏足專員文

案奉 省長警務處涇原道教育廳疊次嚴令禁止纏足一案前
經本知事布告委查剴切勸諭亦在案近來解放婦女日見增多而
未放仍裹之女子亦屬不少合亟再令委查以速放解為此令仰該員
遵照會同警區挨戶嚴查如有抗令未放者拘其父兄送縣罰
辦以符上令而免觀望切切毋違此令

委各區查糧專員查明有無損耗文

照得社倉儲糧用備荒歉疊經奉令整頓收儲在倉續捐糧石亦
據社正副結報收齊在案現在社糧有無損耗及損糧是否

收齊亟應查明以昭核實合亟令仰該員遵照馳往會區警傳
集社正副查明實情呈報毋得扶同隱飾干咎切切此令

令委各區調查員徵集工作農產物文

照得本縣定於本年六月一日開全縣興業物產展覽會所有本
縣工作物農產物均應調查徵集以便開會陳列並將工作物
農產物製造耕種最優之戶查明開單以憑給獎而資提倡
合亟令仰該員遵照前往該區會同巡官巡長切實查明徵
集物品開列姓名以便給獎用備陳列再每物購買一件照價

付給回縣開報不得強取切切毋違此令

呈為遵令呈覆訓示事案奉 尹憲令飭整頓警團以資防範而
重地方一案等因奉此知事蒞任後於七年四月一日成立保衛團推

廣警言察名額實行照章整理並訂有詳細團章呈明 省長暨

前尹憲批准立案在案茲雖粗具形式尚鮮精神然較之未經操練者

究稍知捍衛意義及擊射步趨矣自應再行嚴督警團認真稽查

佐總

更番訓練以期消患未萌閭閻安枕上副 尹憲綏邊捍患未雨綢繆

之至意惟是年來保衛團雖由地方籌有微款購置來福槍六十枝
警所亦有來福槍二十枝特大帽鉛丸不滿百顆仰聞 尹憲庫儲火
帽鉛丸為數甚多各界僉祈轉呈籲懇 恩施逾格發給火帽一萬

鉛丸五千以備守陴之需而壯居民之氣並願繳價五十元等情前

來 知事 伏思靜邑城大糧足四山為固元明以來屢為強寇所據近可

拊平之背遠足扼秦蘭之吭陝氛不靖隴汧比鄰自應加意防範

虛聲鎮懾非畧備火帽鉛丸何足以安人心而固衝要據情仰懇可

否給發警團帽丸之處伏候 訓示祇遵所有遵令呈明整頓警團

並願懇給發帽丸備用各緣由理合具文呈明 尹憲俯賜鑒核恩准
給發以重地方謹呈

涇原道道尹歐陽

呈

呈為呈覆事案奉

廳長第二十五二一號訓令案奉

省長令據莊浪茶馬廳理番委員李衡芳條呈財政萬窘清查各縣荒蕪銀糧草束一案後開令仰該知事即便參酌地方

情形於文到十日內妥議辦法章程呈賚核辦知事正擬呈報間
復奉訓令同前由等因奉此遵查粘單開列靜甯縣原額墾熟
現荒丁銀糧草束除墾熟不計外現荒地丁一千二百三十七兩零現
荒糧石九百四十二石零現荒草三百七十五束二分即知事上屆冊報
荒蕪之數自應招墾以期復額究之銀糧未復原額而地畝強半墾
闢近年來知事因公下鄉見夫川原山坡凡成塊段地畝已成熟地
其現荒者澗溝沙灘荒地甚屬寥寥荒蕪銀糧尚在數百推原其
故鄉民新墾地畝隱匿未報與夫上中下地三等科則里書概以下地升科

及糧差下鄉索求農戶蒂欠尾數彼此混匿此銀糧未能復額之實在情形也茲奉前因謹擬辦法章程四端請為我

廳長陳之一獎勵員紳鄉村集鎮農家戶數田地畝數某戶為土著某戶為客籍舊墾與新墾地畝應額銀糧其中有無隱匿科員應負責任紳耆素所熟悉令其會同挨戶清查實地報墾年例比較墾至十兩以上者由地方官給獎褒狀百兩以上者呈請

廳憲酌給獎章以此推行鄉民觀感或者自行報墾不致頑拒如再隱匿繩之以法寬嚴互用藏成其事規復原額基於此矣一嚴飭里書

靜甯縣屬地畝原額民地更地屯地三種民地更地則額征丁銀屯地則額
征糧草俱有上中下三等之科則向由各鄉鎮紳耆報充里書經管銀
糧底冊凡民間賣買田地由里書過割銀糧乃日久弊生自清道光迄
今百年從未清丈民間轉當串賣幾易手續虫虫者氓避重就輕
只圖微利於目前不顧田賦為正供賄通里書將上中地概以下地升
科以致銀糧現荒多數應嚴飭里書按上中下地升科註冊過割銀糧
積弊一清丁糧自漸恢復矣一懲戒糧差鄉鎮糧戶踴躍輸納者固多而
疲頑抗拒者不無其人非糧差催提延逾期限糧差下鄉旅費口食在

所必需向由糧戶每名下尾欠最少數如丁銀之分厘糧石之合勺以之充
供旅費口食相習已久視為當然不知數雖無幾而積少成多未始非田
賦正供中少一分收入似應懲戒糧差掃數清完毋得蒂欠挪為旅食
至於旅費由各糧戶於正供之外設法酌給或由公家定章發給即可
免斯弊實矣一責成農會縣農會為全縣農民表率應派該會調查
員下鄉勸導墾地完糧以增正供再由知事編撰田賦正供白話告示務
使農民交相勸勉不生畏懼以完銀糧而復原額以上四端於公有濟於

民無擾是否允洽伏祈

訓示祇遵理合具文呈請

廳長俯賜鑒核指令遵行謹呈

財政廳廳長丁

呈為呈請解釋事竊查有某甲係有父之子或無父有母之子家產
殷實游惰無業有某乙見其少不更事誘與相近或勾串賭博或
賒吸鴉片令某甲立約為借款抬高價值以地作保日積月累不
至傾家不止此縣屬東南鄉之惡習也老父寡母咸以為苦如上所
述某乙是否犯詐欺刑事與煙賭俱發罪又奉省長令提倡天足

業經兩載靜民衆多解放者雖居多數 舊者亦所恒有若有對天
足會警察或委員於執行查問時公然侮辱辱罵官廳於稠人
廣衆之中使此項政令不能進行官廳威信因而掃地者是否成
立妨害公務罪刑案懸待判伏懇 廳長鈞示遵行謹呈

甘肅第一高等檢察分廳長劉

又保護東西大道官樹疊奉明令編號釘牌以資查護詎料一般痞
棍不便偷伐竟將樹身所釘木牌任意毀壞數片擲諸溝澗置牌
查釘費款派人手續不易該痞棍竟敢不顧官廳標識任意毀損

目無法紀情節較重應否成立刑律第一百五十四條損壞官員所
施之標示之罪刑併祈 訓示祇遵謹呈

再此地又有一習慣如甲買不動產價不能足有乙願借
錢若干買得業後其業之利息於甲未償清乙債務
時得甲與乙平分其利益實則甲有所有權乙祇有
債權耳每豪強居乙地位而鄉愚居甲地位受其
玩弄三年後乙即以利息平分為所有權共有之根
據興訟甲畏其勢乙遂得產問官不察每墮術中弟
不為強豪所動仍伸鄉愚之冤判為彼之獨有產價
清強豪債款耳此次薛彥昌上訴薛增益即其一也

如依解釋是否犯詐財未遂罪

示知為感

又及

呈為呈請給獎立案核示遵行事竊查整頓高國學校推廣通俗教育
疊奉

廳帥憲明令指示周詳至再至三凡屬下僚敢不恪恭盡職以期仰副

腳憲培養人才為國為民之至意茲將靜甯八年度已辦教育各項暨九

年度計畫各項謹一陳之一七年度由幫新增成立高等國民並女校共

計十七處前經呈明核准在案八年度即就各校內容切實整頓如聘師範

生為校長籌常年款以固校基置簿冊以勤訓練購圖書以資深造

建校舍以合光綫查學齡以增學童開辦全縣學校成績展覽會以資

課程

促進改良全縣私塾以祛迷惑令各校開學生父兄懇談會以期雙方聯合
糾正學生之操行令各校星期一實行敬禮國旗式以期激發學生之愛
國心凡此種種用期事有實濟款不虛糜不敢增設徒事舖張並經省
視學員呈准以模範高等小學校提為優良高等小學校在案此八年對
於學校認真整頓並未增校之情形也一八年分城鄉各校所籌學款
比較七年度收入計常年學款增加四千三百一十九串文又籌得臨時
學款以供建築設備費用者約二千一百餘串文均列入預算宣布衆
知此八年籌增學款之情形也一八年度城鄉比較七年度計增加高

等生一百三十六名國民生三百八十二名女生三十名與七年度共計男女學生九百十
餘名此年度學生增加之情形也八年度建築事項計縣城文昌宮為勸
學所修理房屋九間置備器具附設智羣書局一所又於模範高等校內修築
成績室三間置備棹橙啞鈴球桿地圖案畫等件又於模範國民校內修建教
員室三間添置棹橙書籍等件又於貞靜女校內添置風琴一架棹橙紡車縫
紉書籍等件又於通俗講演所添置黑板長橙懸掛通俗畫十二條布書實踐
倫理一幅置備通俗書籍三十餘種又於閱報所增設桌橙並添購報章三種又
於城外東鄉第二高等學校學座項下新建駝廠一處並添置桌橙書籍等件

又於南鄉第三高等及國民兩校內各新建教室二座並添置棹橙書籍等件又於南

鄉第四高等及國民兩校內新建校舍一座計教室五間自習室十間並添置桌橙

書籍等件又於南鄉之治平鎮雷^雷大灣鎮威戎鎮東鄉之計都鎮西鄉之高家

墜甘溝鎮北鄉之單家集各新建校舍一座教室各數間桌椅書籍各多件此

八年對於城鄉各校內建築設備之情形也其在事出力教職員如勸學所長武

告成縣視學員王爾興勸學員李鼎芬會計員馬承祖並模範優良高等

校長王寶善教員劉青藜牛鴻緒高殿榮模範國民校校長王三錫教員王爾啟第

二國民校長江克成教員穆誌勳清貞校長馬光祖教員藍兆瑞女校校長張

毓貞女教員張素貞通俗講演所長周嗣興均屬異常出力除武吉成王爾興二員

上年請獎外擬懇

教育廳長轉懇

恩施

呈請給予

省長給予王寶善王

三錫二等銀色獎章李鼎芬馬承祖劉青菴牛鴻緒高殿榮王爾啟江竟成
穆誌勳馬光祖藍兆瑞周嗣興三等藍色獎章女校長張毓貞教員張素貞
給予褒狀以昭激勸可否之處伏祈

鈞示祇遵至九年計畫各項謹陳於次一模範高等九年投考學生陡增百
餘人教室難容擬就購買泰署大堂新建合法寬大講堂一座又自習室及
寢室八間現有教員四員再聘英文圖畫手工教員一員又模範國民學業

年亦增擬再建講堂一座並添聘師範畢業生一員貞靜女子國民學校亦因女生增多年齡又大俗習結婚又早宜改貞靜女子高等學校附設女子國民學校分年齡大小授高國課程俾年長者早授高等之教育多所補益三年畢業後出嫁夫家方能有學有識操政持家政改良家庭為改良社會之先聲擬就呈准萬壽宮廢址新建女子高等學校一座添修合法之講堂並校舍又添聘女子師範畢業生一員為高等女校長兼教員以資訓迪又擬女校前院修建養正蒙養院一所擬以女子國民校長張毓貞兼充保姆將教育部編定蒙養院書籍並商務印書館出售部定幼稚作法織數等書及各種積木

各種玩具購備以端蒙童而培初基俟達學齡即可入校而免嬉荒沾染惡習又擬於縣署東邊隙地建修小通俗圖書館一座購備教育部審定各種通俗書籍圖畫羅列中堂任人披閱不准污損又擬於縣署大門左方土地祠改建講演所一座增委講演員一員赴鄉講演於所內購備甲種幻燈一具留音戲機一具為引人悅聽之計於閱報所內增訂南通日刊因南通教育實業創辦甚早可資借鏡效法又訂北京實事白話報因社會普通人識字有限對於京滬文話報多不措意宜陳列白話報引起一般人閱報之興趣並擬推廣講演閱報於鄉鎮間於四鄉四警言局增設講演分所閱報

分所各四處選用中師畢業生管理其事又擬於舊倉院內建築一種工業學校一所為職業教員畢業回靜振興職業教育之準備又建築通俗學校一所依問答啟發方法強逼收集社會上游手之失學青年先施體操遊戲及國民遊戲畫稍收放心然後專施問答啟發教授開其醒悟可入校者入校可習手工者入毛棉傳習所總期人各有業家自豐腴無游手怠民傳播不良之惡習社會秩序自能整肅學校學生亦端趨向矣其他各高國學校更易增聘教職員及添建教室購備圖書等事應由督率各教職員竭力改進以期完善以上各計畫實行費用估計非五千串以上不敷開支應

由^{知事}設法籌增歲成其事至全縣學款全由勸學所收支編製預算呈報備案惟單家集治平鎮三處由該鎮辦學紳員經收開支本年應全提所色收以昭畫一而裕學用每至年終列榜宣布俾眾知曉以期核實此九年度教教計畫之概畧也以上計畫中如改貞靜女子國民學校為貞靜女子高等學校附設女子國民學校并用舊倉院建乙種工業學校及通俗學校用舊倉院塌房並縣署東邊隙地建小通俗^書圖書館用縣署土地祠改建通俗講演所四項應懇

訓示批准立案以速進行而重學務所有呈明八年辦理教育狀況

暨九年教育計畫懇請給獎立案各緣由理合具文呈明

即廳憲俯賜鑒核訓示祇遵謹呈

照得裁判違警事件為本所長職權疊奉

處令不准放棄職權更不准警佐巡官等侵越權限違
法受理以肅政令各在案現查各區距縣甚遙照章自應受
理違警事件惟預擬判文後應呈明本所長批准方能
發生効力嗣後各該員等受理違警事件半月列表呈
報核准方生効力若匿不呈報一經告發或被查明即應

照章懲戒决不寬貸以符上令而重警政除布告通行外合亟令仰該巡官等遵照呈報毋得延違此令

你們到所要遵警章盡職務不准勾串劣紳土痞苦害善良從中漁利自取咎戾

受理違警事件要照違警罰法處分其通令警所應辦行政方面事務應照行政執行法及本縣單行章程處分不得干預民刑訴訟

疲玩與朦蔽二大本領為清末官吏欺上殘下祕訣當此

民國設警衛民萬難恃此溺職自私如果屢犯不悛嚴予
懲戒决不寬容

受理違警事件應照令發表式半月填報毋得匿壓自
貽伊戚

照得紙幣不兌現款疊奉

帥令禁止依法嚴辦况乎無本小商動發紙帖展轉撥
兌不得現錢以致鄉農趕集出售產物無錢應用燃眉在
急減折兌現似此苦困農民實屬市場商蠹明令煌煌

弁髦不顧豈僅巧取實同詐財若不從嚴禁革何以
蘇民困而息澆風相應函達貴會知照轉諭商鋪一體
遵照嗣後商鋪行使紙帖除不照章禁止暫依習慣使用
外非有三家商店連保呈請書送會存核不得出使紙帖
以示限制又此次布告之前無本小商已出紙帖若干一時萬
難收回應將帖數報明商會警所備查限定六箇月完
全收回如有三保仍准行使不准撥免不准折扣誰家紙
帖到門付現如再違犯不付一經察覺或被告發即由警

所拘其號東或其舖掌送縣法辦以昭炯戒言出法隨
決不少貸切切此致

任命靜甯縣知事兼督軍公署軍法科科長周 布告

照得本知事頃奉

隴東鎮守使陸函開援隴甯軍支隊分統總指揮官管
帶甘肅新軍第一營董移駐靜隆一帶以資防範等因
奉此查甯軍援隴勞苦功高駐隴二載有餘紀律嚴明
秋毫無犯久為隴東各界所愛戴茲者移駐靜境保衛

閭閻紳商各界額手歡迎所有每日備辦供給糧料柴
草等件已由本知事指定處所派委專員經理其事合
行布告為此示仰合邑民商人等遵照仍行照常來集交
易毋得疑阻自礙生理特此布告咸使聞知切切此布

呈為呈請示遵事伏查民刑訴訟應用部頒狀紙行政訴
願應用呈文紙照章貼用印花以示區分而符定章靜甯
民刑訴訟與行政訴訟願每混用狀紙既妨印花之推行復礙
上訴之費卷茲擬由科依公文式製備呈文紙每張照狀

紙售價二百文除紙價外有餘充作警捐每半年列報收數一次雖為數無多究於警款不無小補合無仰懇處憲核准備案以垂久遠再第二班警察教練所定於七月十日開所教授並委存記警佐毛武超為正教員合併聲明理合具文呈請

處憲俯賜鑒核指令遵行謹呈

簡任甘肅全省警務處處長鄭

呈闕教育廳長改良戲曲並賫條例文

呈為呈請示遵事案奉

廳長令發

教育部改良戲曲通令一案等因奉此知事遵即令行勸
學所遵照辦理並由知事擬定靜甯縣改良戲曲條例十
項為改進戲劇之準備是否可行仰祈

訓示祇遵所有呈請核示改良戲曲條例各緣由理合具文
呈請

廳長俯賜鑒核指令遵行再山東新劇本可否發下抄

用併乞示遵謹呈

改良戲曲條例

一本條例因遵教育廳奉發教育部改良戲曲通令訂立
由縣呈明教育廳核准施行

一本條例規定改進戲曲各項為縣單行章程之一種應由
縣公署執行之

一全縣內大戲小戲及各種唱曲非經勸學所審查認定
不傷風敗俗者方准在城鄉演唱

一外縣來演大戲小戲應先報明勸學所由所審查認定
可演方准演唱以示限制

一從前戲班之領班及唱脚不得結黨拜盟以除惡習並
由勸學所傳集各領班開一改良戲唱談話會使知戲
曲為正當營業係社會教育之一種不得妄自菲薄腐

濁人羣

一從前劇本凡誨淫誨盜之戲概行禁演暫演節孝義俠
各劇再參演教育部審定陝西易俗社各戲劇以醒社會

一縣城從前武廟或城隍廟內公眾釀資暫設正俗學社所
教演新劇並由易俗社聘請名伶用資改進

一燈影提線雖屬小戲普遍鄉鎮推廣較易收效更速
應雇就製造影片技匠造成新劇之新人物參演以
輔大戲之不及

一新劇劇本懸獎聽人自由編撰呈明縣署轉呈教育
廳審定再演以昭慎重

一本條例自奉令核准之日施行如有未盡事宜隨時

增入之

呈閩教育廳長籌設公立中學校及乙種工業學校文

呈為呈明示遵事竊查靜甯境地遼濶人民繁庶知事蒞任以來竭力振興教育推設高等四處國校二十餘處計高校畢業業學生不下百餘人欲赴蘭平升學苦無接濟資斧欲輟學充當教師又乏普通學識只有坐廢牖下不能深造成材靜人嗟歎異口同聲本年疊經紳學各界暨學生父兄呈請籌辦公立中學校及乙種工業學校以

資補救前來並由紳學各界發起慨捐九年本省短債及隴東借餉為該兩校基本金先由學生父兄全體樂捐呈署為各界倡似此人民自動興學實為一地方興盛之兆智事奉為民牧自應指導以觀厥成而副

德意茲擬指定本年贖買叅將公署前半修建公立中學校後半修建乙種工業學校擇高小畢業學生年齡較小聰穎可造者收入中校以培人才至年齡稍長性質遲鈍者收入工校以興實業其校長教員先由本省師範畢業

中校畢業生中擇尤委任先辦一年經費稍裕再聘北京南通教員以資深造其常年經費擬由畜稅二分學用提充一千串其餘不敷之數由知事明年設法籌足以垂久遠又建築校舍設備書器亦須鉅款仍由知事竭力籌集以竟全功中校趕明春成立開學工校趕明秋成立開學工校教員即擬以上海職業養成所畢業學員周煥文充任並擬委任勸學所長武告成縣視學員王爾興會計員馬承祖為中工兩校籌辦員各專責成以速進行此知事籌設中工兩

校之概畧也是否有當伏乞

鈞誨祇遵所有籌備設立公立中學校及乙種工業學校委員進行各情形理合具文呈明

廳長俯賜鑒立案訓示遵行謹呈

呈請教育廳長擬委王爾興等代理中校校長教員並請

頒發給
記式樣文

呈為呈請核示事案查知事籌辦縣立中學校一案奉

令指示各節遵即督同籌辦員竭力籌畫以期完備並擬籌款購買官產項下之都司衙署用其木石以補忝

將衙署之不足建成宏殿合法之中學校又明年上學期
開學擬委縣視學員王爾興代理中校長師範畢業之
劉青恭周煥文二生代理教員勸學所長武告成兼學監
一俟秋季下學期再委新師範畢業之王爾全為校長
兼教員又農校畢業之馬叶吉苟士俊為教員以上三生均
明年夏季畢業均程度優良如蒙

廳憲就近詢及該校校長等必能據實上呈其允堪師資
之選可樹後進之模矣如南通聘員允來再行呈明核示

除事項冊位置地圖中校學則履歷等附呈核示外所有
遵照部令呈請設立縣立中學校各事項緣由理合具
文呈請

廳憲俯賜鑒核訓示祇遵並祈頒發中校鈐記文式以資
利用謹呈

一名稱 甘肅靜甯縣縣立中學校

二位置 係賄用官產項下前清叅將衙署修建另圖繪呈
三學則 遵部令編訂另冊繕呈

四學生定額 第一年收一班學生六十名第二年第三年
第四年節次增收以收足二百四十名為定額

五學生納費額 本校學生暫不納費

六開校年月 民國十年三月一日開校

七經費及維持之方法 由全縣各界捐助中央本省各項公
票為基本金息金作經費並由畜稅學用項下提十分之
二作維持費以垂久遠

八校長教員之姓名及履歷 另冊繕呈

呈為呈明示遵事案奉

廳長令開云云此令等因奉此知事遵即鳩工庀材建築設

備歷五閱月蒙養園幸告落成計建講談室九大間遊戲

室五大間保育室五大間遊戲場一處棹橙玩具齊全因表

校長請病假又由陝所聘保姆年內未到暫委勸學所長武

告成縣視學員王爾興充任教習分班授課會計員馬承祖

經理一切庶務已於十一月一日成立開學計有園生 名

暫兼園長部署一切以資進行又新建通俗圖書館及公共閱報所通俗講演所三處均於本年春夏季落成開館以上四項均由董事捐款創建親為督造自春徂冬均幸告成以期仰副

廳憲振興教育與民更始之至意應俟省視學員蒞勛再行呈報以昭核實外理合具文先行呈明
廳憲俯賜鑒核備案訓示祇遵謹呈

計賚 園生名冊一本 玩具清冊一本

為宣布事照得本行政公署自民國九年八月一日起至十二月底止依民刑法令及行政法令規定所有收入行政司法違警各項罰款暨照章領地繳價數目以及各項因公用途詳列宣布俾衆週知此布

維 年 月 日某官某致祭於

先農之神前曰惟○神肇興稼穡立我蒸民頌思文之

德克配彼。○天念率育之功常陳時夏茲當東作咸服
先疇洪惟古皇之尊歲舉推畊之典。恭膺守土敢忘勞
民謹奉奠章聿修祀事惟願五風十雨嘉祥恒沐○
神庥庶幾九穗雙歧上瑞頻書大有尚饗

任命靜甯縣知事周 白話布告

照得本知事創辦中和火柴公司 原為製造國貨養活窮
民起見 你們鄉間百姓 怕未全知 合再布告 擺籤一

架 付錢十五 裝火一盤 付錢十文 糊匣一百 付錢二
十 男婦老幼 都能做好 一天十架 可得百五 一天
十盤 可得百錢 一天千匣 可得二百 一家幾口 一日
幾串 急可充饑 緩可製衣 別出生計 便爾衆民
特此布告 大家興起 速來縣城 一試便曉 慎勿
遲疑 自誤生理 切切 此布

行政公司女廠

禁止閒遊

長政
周 倘敢故違

警拘重辦

示特此示諭

一體凜遵

為布告事照得本知事創辦中和火柴公司原為提倡實業養活貧民起見現已建築竣事開工在即排籤裝火需人甚多貧家婦女均應工作廠內嚴肅婦人監工路上崗警加意保護良家婦女均可放心作工得資家用寬餘勞力強健可享大年合亟布告仰合邑人民一體知照夫勸其妻父勸其女赴廠工作各謀生理慎勿疑懼坐

食困累切切此布

復蘭山道尹陳

尹憲大人鈞前敬稟者自通渭查案歸晤駱所長奉讀
鈞示敬悉一一詢知

政躬爽適系仰大慰承

囑一節自應遵

命擁護惟蒞所過遲不能平分秋色幸入土不尠報
驗必能敷用也再元承乏三載潔已奉公澆風漸息頑

者歛跡對於徵收機關人皆重視即有疑阻發生無不委
曲求全冀能稍補公家不重擾愚民耳若殘民以逞不
顧公家不開誠忠告寅誼友誼兩失其道矣

明訓煌煌洞見癥結益當省惕遵循上副

殉命五泉秋老紅葉滿灘雨潦之餘邊方風勁公暇伏惟
為國崇護肅稟敬叩

崇祺伏乞

垂鑒下吏廷。頓首謹上

呈悉該警佐請求將孫占魁債務案移送莊浪衙門判結
等情核其情節是直以莊浪為該管以本縣為不該管
耶殊不知本縣對於民刑案件一切悉遵法律並非越俎代
庖以靜甯官廳妄管莊浪之事也法之所在瀆職堪虞
夫固有不能不受理不能不處分者在焉查民律土地
管轄第十三條訴訟由被告普通審判籍所在地之審判
衙門管轄之又民律土地管轄第二十三條因違約請求

損害賠償者得於履行債務地之審判衙門行之又刑律
草案管轄各節第十五條二處以上審判衙門均有土地管
轄者應以先受公訴者為管轄審判此案孫占魁揭債不
償係屬民事範圍該巡警既在此地充警自應以靜甯
為履行債務地孫占魁復因抗債不還遂致永成堂發生
拉馱之案又係刑事範圍陳士吉先向本縣衙門起訴尤
應以靜甯為審判衙門根據以上法令無論民事刑事本
縣對於此案均有管轄職權又指定管轄移轉管轄二

種現行法令必具有應行指定移轉之情形由檢察官
向直接上級法廳聲請方為合法該警佐既非本縣上
級官吏對於本縣已經判決之案因與孫占魁有同鄉
關係輒敢呈請移轉而又必須指定侵權違法殊屬駭
人聞聽除將孫占魁依警察獎罰章程第十六條第一
種先行停用歸案以公力執行債務外所有該警佐呈
請移轉管轄所憑者係何法令仰即明白呈復此批

呈為呈請核示遵行事案奉

廳長訓令更換磨帖發下乙丙兩種及增課數目飭令征收等因奉此當派科員馳赴各鎮溯河而上依次清查從前隱磨全數畢露共計查得水磨 百十 座磨戶

紛紛來縣籲懇不換其原因以增課太多十倍有餘無力繳納不敢換帖等再四開導以全省公令所在一縣何能獨異令先換帖再調查渠水磨利情形果有空碍之處再行呈請

廳憲量予減等以蘇民困幾經開導方始承換計已換
齊一俟帖費繳清即行另文呈解外茲將節經查明磨
戶困苦不能担任重課實情為我

廳憲一陳之一靜甯居羣山之中境無大河只有縣之東
南山中出有小河兩道至水洛城合流因生齒日繁無業
可圖除農人外即立磨為生每立一磨草屋一間小者
三四十串大者百餘串文遂將一河之水分作四渠沿渠立
磨五百數十座而此河水源並非山泉涓涓不息河身又

係沙底不能蓄水每因夏潦則盛漲泛溢秋冬則雨少水涸夏時雨足四渠並轉雨缺輪流停轉若秋冬河乾竟停十分之七名雖水磨實則枯磨較之黃河洮河沿岸水磨大有天淵之別此河小渠多磨多停轉之不能增課實情也一蘭狄各處水磨磨麩行銷既廣利金亦鉅有磨一座即成富室此地交通不便均在山中來磨者俱屬山民有馱馬者自行轉磨為磨戶者不過守一磨為糊口計磨穀三斗抽芻一升隨取隨喫再不給錢如無人力之磨戶

將磨租人每年得錢五六串至多十餘串文磨多水少停
多轉少無利可贏故爭水訟案絡繹不絕磨利未覩磨害
立見若照新章每年科以四元磨課萬難如數繳納此磨
無大利磨戶極貧之不能增課實情也一磨戶從前雖分
中下實則中下者其名不同完課則均以每年每磨出
錢六百文為限今新章定乙丙等以代中下名目昔之出
錢六百文者今則乙等每年出洋四元以現時二串二百折洋
一元計算較之上年增加十三倍之多前之同出六百者今又

一多一少增加之多駭人聽聞民力已竭萬難担負若必實行鄉愚無知定至激生事端或全停抗課此舊日磨雖分等課則一律令忽多少不一猛增太巨之不能增課實情也一從前無力出磨課之戶悉多兩家出一磨課或匿不領帖此次沿河沿渠一查前之匿磨全行搜出均須領帖照章納課實則前之出六百文無力者今責令出四元或二元能辦到乎前之共出一磨只六百者今責令各出四元或二元之課能辦到乎此磨無隱匿民實貧困之不能增課實情也以上四端均經

再四偵查明確毫無諱飾之實在原因當茲軍餉浩繁羅掘無術稍有一綫籌款之隙無不竭盡聚斂之力稱貸於民猶且應募況應出之磨課乎惟是增課太多分等又異形格勢禁民力難支與其釀事無益於後不若設法變通於前知事再四思維擬於靜甯各磨全係山中小磨靠雨為生者一律改為丙等以符當日同一之稅則而課稅仍增五倍不止本年又出帖費一次於公於民兩有裨益再此次換帖派員下鄉收款已逾四月困難萬分甫繳帖費又出磨課如不稍予變通

減作丙等本年磨課萬難收集下情如此迫而上陳仰維
廳憲痼瘼在抱體恤民艱應如何減免以蘇困苦而重
課稅之處伏候

訓示祇遵所有山磨無利增課太重民力已竭無法担任
各緣由理合具文呈明

廳長俯賜電鑒核准減作丙等以裕民生謹呈

呈為呈請訓示祇遵事竊查九月二十八日據高家堡紳約

楊生洋李楷呂得善等狀訴西區派出所巡長毛三畏私
伐官樹恐受拖累等情到署當經批示狀悉三里舖官柳
三株朽壞已久前據該區巡長毛三畏報告被人斫傷前
來當即批准伐存警言所留備補修橋梁之用在案並
非私伐該紳約等遇事生風飾詞冒稟殊屬誕妄至云
四株其餘一株究係誰斫仰候行林會同科查明核奪
又狀稱磕害百姓四字被害者何人所磕者何事狀內既未
指出亦屬空言捏誣特斥等語在案隨據林務會長王

俊臣呈覆會長奉令遵卽會同科中錄事王覲文親往
高家堡邀集楊生泮等查勘間該楊生泮避匿不面李
楷聲稱不明此事亦未聯名具稟不往查勘鄉約呂得
善亦稱並未聯名具稟遂約楊生泮之子楊拾拾子并
喚鄉約呂得善及毛三畏等同面勘得高家堡向西三
里鋪地方官道南面有伐倒柳樹一株其樹身已鋸二節
一節量圍圓尺餘長約九尺一節量圍圓五寸長約四尺
迤西半里許又有伐倒白楊二株樹身均鋸為二節量

圍圓一尺三四寸不等長約一丈八九尺以上楊柳三株均係
久已枯槁並非生伐所質之鄉約呂得善聲稱當日查勘只
此三株並無四株之事又質之楊拾拾子語塞並問尚有一株
在於何處該楊拾拾子默思良久始指此楊樹之東面樹根
為一株當即同勘得此樹根外皮無有早被游民剝落近根
鋸痕色現灰黑係被伐早久雨淋日炙並非新鋸之痕其
圓徑樹質與現伐已枯二楊一新一舊形跡大異該楊拾拾
子無詞可答會長等誠恐游民將此舊伐楊樹之根剝取炊

薪湮沒證據當即用鐵條火烙印字左半以存真相再查
楊拾拾子指出舊伐楊根由平地線量高五寸四分周圍一尺
六寸五分其斷面東西六寸南北六寸四分合併聲明並鍊條
右半面印字理合一併呈明縣長核辦等情據此覆經
傳該紳楊生泮到縣訊判間據該紳楊生泮抗不投案並聲
言業已上訴

憲轅委員查辦不到縣審等語查靜邑三十六鎮每鎮有
名當家人者二三人為一鎮之專制魔王指使鄉約班差為

爪牙武斷鄉曲殘害良善民人呼之為當家人差役稱之
為爺其實質即刁紳土豪訟棍之混合體也警察不受
其指使往往得罪彼曹動以上訴為脅制之伎倆知事雖
庸懦書生究無所顧憚平日就事斷事合法合理良心
認可放胆為之不為彼曹豪右所搖也再彼等當家人
每值新憲蒞任之際必有一番搆煽株連員役之上訴已
成慣例矣茲該紳楊生泮既稱上訴
憲轅抗不投審知事暫為停審先行呈明仰懇

賜委專員勸查詳實虛實曲直自然水落石出若該紳
並未上訴希圖免審更祈

訓示可否依妨害公務之律或虛誣控訴之條治以應得之
罪刑以息刁風再本年春季令飭該巡長毛三畏在高
界二鎮補添栽植楊柳三千餘株即撞損栽柳者疊經
罰辦在案該巡長何能私伐官柳不辯自明又地方習
慣每用枯稿官樹為搭修橋梁之用以公濟公歷任如此
辦理在案該巡長見有枯樹恐被人伐報告前來知事

令其伐存警所留備修橋之用一依舊例並非創舉也
所有呈明楊生泮狀訴巡長毛三畏私伐官樹查明虛
捏抗不投審請示遵辦各緣由理合具文呈明

尹憲大人俯賜鑒核訓示祇遵謹呈

呈為遵令呈覆示遵事案奉

廳長訓令開案據該縣民人云云此令等因奉此遵查此
案本年七月十五日據縣民吳世昌以毆女自縊喊訴李

有緒李福星免等到案當經知事面訊吳世昌據供其女

與壻口角相打打後乘家中無人自行自縊是實身有微

繩打

傷不願相驗等語知事因既有微傷雖屬自縊依法不能不

驗其時正赴隆德查案遂委管獄員李福清帶吏往

驗該民吳世昌又呈攔驗前來亦未批准旋於七月二十

日據獄員呈復相驗實係生前自縊惟未縊之前與夫

壻口角被夫扭打數下右肩傷青色一片圍圓

左肋繩打傷股皮未破紫青色長寬是實

於二十五日開庭審判訊實李有緒夫婦均在地工作其子福星免回家因事與妻口角用馱麥麻繩責打數下復往地內馱麥再歸則妻已雉經矣其父母聞之回救已無及矣吳世昌當堂亦自供李有緒夫婦平日看待不好此次在地屬實其婿年只十五幼小無知願以私訴依習慣與娘家出燒埋錢文以便厚殮其女再無他意等語知事因見李福星免夫婦兩小無知輕生自縊遂依其岳吳世昌請求以私訴斷李有緒出燒埋錢五

卅串付娘主厚殮以完斯案兩造遵斷去後嗣據李有
緒喊訴未驗之前有吳世昌之弟世藩磕詐去錢二十串
應否追要知事諭以該民非屍父應追作燒埋費用此項
錢文該吳世藩既不交出又畏罪不敢到案以致吳世昌
尚未領取吳世藩畏拘避匿赴平上訴此本案經過之
實情也伏查靜邑東南鄉有兩種惡習一自殺種命一
子小婦大自殺種命者自殺之本人知其死後其被誣告
之家必大受拖累損失其家必得巨額燒埋費用故視死

如歸而自殺案疊出不窮或病沒移屍誣賴習為常事
幫到任後攷其所以致此之由皆緣歷任不能親驗屍傷
判為誣告且以巨額燒埋費用拖累被誣之家以致演成
惡習牢不可破幫故於上年首辦以病沒誣賴之孟正堂
判徒二年又於燒埋費用從輕判斷使原訴人無利可
獲至多不得過五六十串並令其親戚監視用於殮醮不
准私吞此雙方制止自殺惡習之情形也子小婦大者因
鄉民無知子雖小必娶大婦以供操作因其心非為娶婦

生孫實為娶婦奔走故責新婦負家庭之操作甚苦若
娘家富而婆家貧工作苦而夫壻小勞苦衷曲無可告訴况
翁姑不能癡聾夫壻又兼慙小稍生口角乘隙輕生此種
家庭慘劇最易發生一經演出親戚朋友均思染指而嘗
故此項自殺獨多而病死賴債者次之知事以禁止早婚為
正本清源計畫又以少出燒埋費用為調劑辦法因辨誣
告以制止自殺風習若於虐媳之家不令稍出燒埋則一時
不能盡撤消不合法之婚姻而一般子小婦大之舅姑又得

肆意凌虐他人之子女矣此又雙方制止姑惡婦大流弊之情形也本案之所以依私訴斷燒埋未辦誣告者即本上項兩理由也是否允洽伏候

鈞示祇遵再 鞫對於命盜案發生喊訴時即親自訊問如遇原訴人供認自殺者即委獄員相驗不准攔和以昭慎重合併陳明又吳世藩始終未到案質訊可否飭令回縣如有不服判決情事再行賚卷送審以符法例所有遵令呈明吳世藩上訴李有緒等一案初審經過各緣由

理合具文呈明

廳長俯賜鑒核訓示祇遵謹呈

